

lis Gnovis

■ **BRASILIA.** Un ministeri pai Popoi originaris

Sônia Bone de Souza Silva Santos Guajajara, nassude tes tieris de nazion Arariboia, e sarà titolâr dal prin Ministeri dedicât ai Popoi natîfs, te storie dal Brasil. Le à nomenade il gnûf president, Luiz Inácio Lula da Silva, che il prin di Zenâr i à dât la volte a Jair Bolsonaro, dopo di vè vinçût pe tierce volte lis votazions presidenziâls. Tal Guvier e lavorarà cun Sônia Guajajara, come ministre pal Ambient e dal Mudament climatic, un'altre femine de Amazonie, al ven a stâi l'ambientaliste Marina Silva, inomenade pes sôs lotis cuintri de distruzion de foreste e pe fondazion de «Central Única dos Trabalhadores», cul sindacalist Chico Mendes,assinât dal 1988 dai latifondiscj.

■ **SAN MICJÈL/VRH.** Mil dal Cjars

Cu la mostre fotografiche digjitâl «Food Heroes», progetade di «Slow Food» di chê strade de «Setemane de cusine taliane pal mont» e promovude dal Ministeri talian pai Afârs forescj e pe Cooperazion internazionâl, e ven contade ator pal mont ançe l'esperienze di Sara Devetak di San Micjèl/Vrh. Te frazion di Savogne/Sovodnje, sul Cjars gurizan, e puarte indevant, cul so om Pavel, l'aziende agricule rigjitate de famee, dulà ch'è prodûs «Miele Marasca del Carso», «Presidio Slow Food» che lis sôs âfs a gjavin fûr des rosas dal Çariesâr salvadi (Prunus Mahaleb L.). Prin di tornâ a diventâ contadine, Sara Devetak, ch'è a trê fis e ch'è smire di trasmetiur l'ereditât di lôr nono Renato, si è indotorade in Lenghis e Letaris forestis.

■ **UDIN.** Il Montâs in recipis

Ançe dome cuntune fete di polente al clame dongje odôrs e savôrs di une volte, e une sole sclese e je in grât di fa gjoldi parfin la taule. Ma il Consorzi pe Tutela dal Montasio doc al à fat une altre pensade, ch'è di racui tantis recipis cun chest formadi, pensadis di un cogo di gale, Pauli Zoppolatti, che al propon matrimonis culinaris cul pes, cun la ciar e parfin cui dolçs. Un gustâ complet al è servit!

■ **MARTIGNÀ.** Une gnove di lecâsi lis vibrissis, o ben lis mostacjys

In chel di Martignà une cubie di zovins a a àn sconzurât la sierade dal Cat Café, il locâl indulà che tancj amis dai gjats a si cjavavin par une gullizon in companie di tancj di chescj piçui nemâi, che tal locâl a vevin cjavât un solet e tant afiet. Il Café al riscjave di sierâ parcè che la sô proprietarie e veve vût un incident, e no rivave plui a partâlu indenant. E ve che doi zovins, Aurora e il so morôs – che a si jerin cognossûts propit frecuentant chel ambient – a àn decidût di cjavâlu in man e di puartâ indenant la ativitât a pro dai felins e dai lôr amis.

Miercus 18	S.te Prische martare	Domenie 22	III Domenie vie pal an
Joibe 19	S. Mari martar	Lunis 23	S. Marcel I pape
Vinars 20	S.ts Bastian a Fabian m.	Martars 24	S.te Merenziane v.
Sabide 21	S.te Agnès vergjine	Il timp	Si fas sinti il frêt



Il soreli
Ai 18 al jeve aes 7.44
e al va a mont aes 16.52.



La lune
Ai 21 Lune gnove.

Il proverbi
Ogni mès si fâs la lune, ogni di si impare une.
Lis voris dal mès
Tes zornadis plui clipis il contadin
al scomece a cuinçâ i pomârs, a tirâ
i fii di fier tes spaleris.

Ricuart di pre Meni Zannier

*Om, predi e poete,
al veve 87 agns cuant
che tal 2017 nus à lassâts*

Al veve 87 agns pre Meni Zannier, cuant che ai prins di Zenâr dal 2017 nus à lassâts, ma il ricuart di chest om piçul, di grande culture, poete, scritôr e ferbint om di glesie al è ancjemò vif in tancj di lôr che a àn cjaminât cun lui pes stradis di chest mont, scoltant lis sôs peraulis, l'incjant des sôs poesii e l'incei dai siei poemis, che di bessoi a bastarëssin par un premi Nobel.

Il Comun di Majan miercus 12 di zenâr, al à comemorât il sest inovâl de muart di pre Meni cuntune Messe a Cjasesole e un spettacul, Oracui, dumblis e Lusignis. L'arcipelago lirico di pre Meni Zannier, aedo friulano, di Angelo Floramo, cun l'atôr Paolo Mutti. Al jere apene passât Nadâl, che pre Meni al saludave cheste tiere; ch'è fieste che al veve tant amât, ançe scrivint poesii e pastorâls. Propit cemût che al jere sucedût pe sô La Nativitât di Nestri Signôr, che e pant, te sô atestazion poetiche de Incarnazion dal Verbo, il profont, e tal stes timp, teologjicementri ingenui, sintiment religjôs furlan, che al cjate te ubidience di sigûr confusionade, ma totâl, de Vergjine "Mi confont, ma o dis un sì", la realizazion di un dissen salvific che al ven



Pre Meni Zannier ai prins di Zenâr dal 2017 nus à lassâts

Il Comun di Majan, ai 12 di Zenâr, al à comemorât il sest inovâl de muart cuntune Messe a Cjasesole e un spettacul

ufiert a dute la umanitât.

E je un afresc corâl, cheste Nativitât, che si vierç cul coro dai Juscj di Israel, che a lôr ur è dât di di anunziâ il compiment de Scriture: "Dal antic dai dis al ven / un profete redentôr/ ch'al è Diu cun nô, il Signôr / e nissun di Lui plui den". La Nativitât si displee vie pe narazion di Luche, une sorte di evangelist popolâr, vòs che e conte e che fâs di introduzion ai episodis de Nativitât.

Cun cheste nassite, il proget de reden-zion a si fâs storie, incjamantsi te umanitât, e diventant promesse di riscat.



Il test de Nativitât

E lis piçulis storiis di oms e feminis a cjatin, tal cjant dal Magnificat, "L'anime mè e magnifiche il Signôr / e al è il gno spirt che al gjolt un Diu di lûs", il compiment plui alt de storie de salvece, trasformant une cualsisei gnot di Betlem te gnot di lûs che si cumplirà la antighe promesse. E propit cun chest lavôr un grup di amis a àn volût ricuardâ pre Meni tal timp di Nadâl, tes parochiis di Plain e di Felet, grazie ai letôrs de "Companie da Franca" e dal coro de SAF di Udin.

Roberto Iacovissi

Associazione Aulùs. A Cjampfuarmit une sere tal non di Tolkien

Une sere tal non di Tolkien e dai progjets – in marilenghe – che la associazion Aulùs APS e propon par fâ cognossi chest autôr tal nestri Friûl. L'apontament al è par lunis ai 23 di Zenâr 2023, aes 20.30, in te sale de Pro Loco di Cjampfuarmit, in vie Edmondo De Amicis 2. Dilunc de serade, gratis e vierte a ducj, si podarà scoltâ cualchi leture tolkieniane. A saran presentâts i ultins progjets tolkienians de associazion Aulùs: il Lunari Tolkienian 2023 (che si podarà puartâ a cjase); la gnovissime trasmission radiofoniche su Radio Spazio, disponibile ançe in "podcast"; le ultime edizion de riviste tolkieniane bilengâl «Contee furlane?». Par concludi, si cjararà ançe ai progjets futûrs, soredut leâts al cincantesim aniversari de muart di John Ronald Reuel Tolkien (ai 2 di Setembar dal 1973). A moderà la serade al sarà il gjornalist Giovanni Lesa, diretôr responsabil di Contee Furlane e colaboradôr di Radio Spazio.


Udin, Messe par furlan

A Udin, la Messe par furlan e ven cjantade sabide ai 21 di Zenâr a 5 e mieze soresere, li de capele «de Puritât», daprûf dal domo (cun Radio Spazio che le trasmet sul moment). Al compagnarà la celebrazion il Coro "Ploe di Rosis" di Grions di Sedean. Al cjantarà messe pre M. Tonso.

Tradizions furlanis dal mès par cure di Mario Martinis

LIS CALENDIS

Il pronostic principâl dal mès di Zenâr al jere chel des Calendis (clamadis ançe Albis o Mesais); si tratave di une tradizion sapienziâl di caratar meteorologic difondude in buine part de Italie setentrionâl e une vore inlidrisade in Friûl. La civiltât rurâl di une volte e jere usade a gjavâ fûr strolegaments cjaland l'andament naturâl de atmosfere, il moviment ciclic dai astris, i cambiaments de nature tal cori continuât dal timp e tal dâsi la volte des stagjons. Jenfri lis diversis credincis e lis praticis populârs divinatoriis, ançe in Friûl a jerin des usancis che a vevin a ce fâ cu lis previsons dal timp, ven a stâi i mudaments atmosferics tes cuatri stagjons dal an, cetant utilis di cognossi par stabili i periodis plui juscj pes seminis, cerpiduris, racueltis, incalms, trasformazions e conservazion dai prodots e in gjenarâl par dutis lis voris agrariis. Il pronostic principâl sul timp al stave juste apont tes Calendis che, se ben fat, nol podeve falâ. La prevision des Calendis si formave tai prins 24 dis di zenâr. Ai prins 12 dis a corispundeve



i corispetifs mès dal an (di zenâr a dicembar), biel che pai 12 dis dopo i mès corispetifs a jerin contâts par ledrôs. Cussì, par esempli, il 13 di zenâr al corispundeve al mès di dicembar, il 14 a Novembar e vie indevant, fin al 24 che al corispundeve di gnûf a zenâr. Di chest dopli cont continuât e ven fûr la detule Lis calendis prime a van indevant e po indaûr. Secont la tradizion, se il timp tai doi dis che a corispundeve a un ciert mès in dutis dôs lis schiriis (par esempli il 3 e il 22 di zenâr che a corispundeve al mès di març) al jere compagn, biel o ploiôs, si pronosticave che tal mès indicât il timp al sarès stât ancjetant biel o ploiôs. Invecit, se lis osservazions a jerin in contrast il timp al sarès stât variabil. No dome. La prevision e vignive in ultin confermade o dineade dai "segns" di Sant Pauli, o ben de atmosfere dai 25 di zenâr, fieste de conversion di Sant Pauli: cussì, se il 25 al jere "clar" (bon timp) lis previsons des calendis a jerin buinis, se invecit al jere scûr (al ploveve) lis previsons a falavin e no valevin nuie.